

Date – 09/10/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Governor Pu Indra Sena Reddy Nallu chuan tukin khan Aizawl khawpuia ran talhna hmun AH & Vety. Department enkawl 'Modern Slauhter House, Mualpui' a tlawh.**
- 2. Animal Husbandry & Veterinary Minister Pu C. Lalsawivunga'n vawk pul hri, African Swine Fever chu Mizoram in a tawrh nasat em avangin, State Disaster-ah puang tura hmalak mek a ni a ti.**
- 3. President Draupadi Murmu-i chuan ramhmul damdawi tam zawk a awm theih nan ramchhung thalaite chu Ayurveda sector lamah eizawnna uar turin a sawm.**
- 4. Sawrkar laipui chuan thisen tlakchham anemia leh chaw tha tlakchham ti tem turin buhfai tihdanglam fortified rice sem tel a remti.**

<><><>

GOVERNOR

Governor Pu Indra Sena Reddy Nallu chuan tukin khan Aizawl khawpuia ran talhna hmun AH & Vety. Department enkawl 'Modern Slauhter House, Mualpui' chu tlawhin hmalak dante a enfiah.

Governor chuan ei leh in a hrisel tha em tih finfiah hmasak fo a tul thu sawiin, hemi atanga natna kai theihte laka fihlim tura tanlak a tul thu a sawi a. Ran talh tur a hrisel em tih talh hma leh hnua enfiah zel a pawimawh thu sawiin, ran talhna hmun ni lova talh a awm loh nana hmalak a tul thu a sawi a. Modern Slaughter House Mualpui chu a nihna ang taka mumal zawka kalpui a nih theih nana tan la turin thawktute a chah a ni.

Governor hi Department thawktuten lo dawngsawngin Modern Slauhter House kalphung leh hmalak dante an lo hrilhfiah a ni.

Modern Slaughter House hi kum 2013 ah hawn niin Pathianni tih loh kar tluanin helai hmunah hian ran talh thin a ni a; a hrisel tha em tih Vety. Doctor-in a enfiah thin a ni. Tarlan danin thla khatah chawhrualin ran 500-600 vel an talh tlangpui a ni.

<><><>

HEALTH MINISTER

Health Minister Pi Lalrinpuii'n mihring hriselna enkawl nana damdawi hman endikna tur State Drug Testing Laboratory chu bun ni tawh mahse a taka hman tan a la ni lo chu pawi a tih thu a sawi.

He thu hi vawiina State Drug Testing Laboratory, MINECO-a tlawhna ah sawiin Minister chuan hnathawktu indaih loh vanga damdawi endik ngai Regional Drugs Test Laboratory, Guwahati-a thawn thlak zel a ngai chu pawi a tih thu a sawi a, State Drug Testing Laboratory building sak a nih bak ah khawl tha leh changkang tak tak lei sa chu mipuiin an hman tangkai thuai theih nan thawktu indah vat a pawimawh a, a taka hman tangkai thuai a nih theih nan a tul anga hma la turin thawktute a chah bawk a ni.

Food & Drugs Administration Joint Director Pu Lalsawma Pachuau tarlan danin Drugs Testing Laboratory Building hi Central project - Strengthening of State Drug Regulatory System' (SSDRS) atang a sum cheng vaibelchhia 9 hmangin kum 2021 khan sak niin damdawi endikna khawl chi hrang hrang 36 a keng tel a. Hman mai theihin High Performance Liquid Chromatography leh Gas Chromatography chu rem khawm fel tawh a nih thu sawiin tunah hian Drugs Testing Laboratory chu a tak a hna thawk tur chuan thawktu lak belh a ngaih thu sawiin tun dinhmun ah thawktu Junior Analyst – 3 posts, Laboratory Attendant – 2 posts, LDC – 1 post leh IV Grade – 2 posts te chu sawrkarah dil mek a nih thu a sawi bawk a ni.

Thawktute tarlan danin State Drug Testing Laboratory hi a nih dan tur a kalpui a nih chuan, kum khat ah damdawi sample 1000 en dik thei tur a ngaih a ni a. A chhung a khawl awm te hi changkang leh chhuak thar berte an nih thu an sawi a. Kum 2022-23 chhung a damdawi endik tur a thawn chhuah 121 atang a 17-te chu 'Not of Standard Quality' an ni tih hmuhchhuah a ni.

<><><>

EK PED MAA KE NAAM

Sorkar laipui Ek Ped Maa Ke Naam campaign hnuiah Mizoramah thing nuai 5 chuang phun a ni tawh a.

Aizawl Divisional Forest Officer, Campaign Nodal Officer ni bawk Pi Vanlalnunpuii Hmar chuan Prime Minister Narendra Modi ngenna angin kumin June ni 5 atang khan Mizoram sorkar chuan thingphun beihpui a thlak a, vawiin thlengin he campaign hnuiah hian thingphun belh a ni reng a, Mizoram leilung mil vek phun a ni bawk a ni, a ti.

(BYTE)

Mizoram hi ramchhunga ramngaw ngah ber a ni a, a ram chhung zaa 84.53 chu ramngaw in a la khuh a ni.

He Campaign ah hian sorkar dept bakah school, college, University, NGO, Village Council leh Local Council te bakah mimal thahnawmngai engemawzatin thing an phun a, thingphun duh hi an awm anih phawt chuan Forest Office hrang hrangah te thing tiak lak tur a awm thu Pi Vanlalnunpuii Hmar chuan a sawi a ni.

<><><>

AH&VETY

Animal Husbandry & Veterinary Minister Pu C. Lalsawivunga'n vawk pul hri, African Swine Fever chu Mizoram in a tawrh nasat em avangin, State Disaster-ah puang tura hmalak mek a ni a ti.

He thu hi vawiina Aizawl Vety Polyclinic Hospital Conference Hall-a vawk hriin a man suattute zangnadawmna pek tur puala hun hmannaah Minister chuan sawiin, Zangnadawmna pekchhuah hi kum 2022 chhunga vawk suat sak chhungkaw 1847 te chan tur niin cheng Nuai 263 sing 3 sang 2 release a ni a, tun tuma pekchhuah hi zaa 25 niin a bak zaa 75 pawh hmuh leh thuai beisei a nih thu sorkar thuchhuah chuan a tarlang. Zangnadawmna hi District tina thuneitute'n an District theuhah an sem chhuak dawn a ni.

He hunah hian thusawiin Pu C Lalsawivunga chuan ASF hri chu ven leh tihdam a nih theih nan sorkar laipui-ah a damdawi leh hri danna vaccine siam emaw ram dang atanga lak luh dan tur ngaihtuah turin department chuan Sorkar laipuiah a thlen thu a sawi a. Kum 2024 chhung October Ni 7 thlengin Vawk thi 13809 awm tawhin 23010 suat tawh a ni tih sawi bawkin Vawk suat Compensation hi Kum 2025-2026 chhung Assistance to State for Control of Animal Diseases (ASCAD) Action Plan-ah telhin sorkar laipui-ah dil leh tur a ni a ti.

Compensation kalphung chu state leh central sawrkar intum sem anih avangin Mizoram sum tam tak a kal ral tih Minister chuan sawiin sawrkar laipuiin zaa 90 leh state in zaa 10 tum ve turin dilna pawh thehluh tawh a ni a ti bawk.

<><><>

AMC

Aizawl Municipal Corporation chuan hman khat daih sarang tihrem tuma hma an lakna kal zelah tun hnai khan Aizawla dawr hrang hrang atangin hman khat daih sarang kg 55 chuang an man.

Aizawl Municipal Corporation chuan September ni 24 atanga ni 27 inkarah beihpui thlakin hmun hrang hrangah dan zawm lote an enfia a, plastic carry bag kg 49 manin plate, spoon leh fork chi hrang hrang kg 3 manin wrapping gram 500 an man bakah No kg 2 an man bawk a ni.

August thla chhung khan Aizawl Municipal Corporation hmalakna-a hman khat daih plastic dapchhuah hna thawh naah hman khat daih plastic tam tham tak man a ni tawh a, dapchhuah hna hi Bazarpui leh a chhehvel, Bethlehem Veng, Bethlehem Vengthlang, Tuithiang Veng, Zonuam, Luangmual, Durtlang Leitan leh Durtlangah te neih niin Dawrkai 26 hnen atangin dan in zawrh leh hman a khap polythene, sarang, disposable cup, present tuamna, plastic hmanga siam fian leh fork man a ni a, dan angin pawisa chawi tura hriattir nghal an ni bawk a ni.

Aizawl Municipal Corporation chuan Hmankhat daih sarang (Single Use Plastic) chu ram leilung tana tha lo, tu leh fate tan thlenga nghawng thalo thlen thei tur a nih avangin mitinte hmanglo turin an ngen tih an sawi bawk.

<><><>

BJP MIZORAM

N Lungleng-a Aizawl FC Field tihchangtlunna tur Power Finance Corporation (PFC) atanga CSR Fund an hmuh cheng nuai 546 leh sing 9 chu State Sorkarin a hup bet niin BJP Mizoram chuan thuchhuah siamin a sawi a,

Central atanga Thalai te hmakhua ngaia hmalakna hi akhaihlak anih chuan nakin zel ah hetiang Funding hi chan a hlauhawm hle an ti a, Mizoram Sorkar chuan N Lunglenga Aizawl FC Field tihchangtlunna tur chu a rang thei ang bera tihfel sak turin Mizoram Sorkar leh Sports Minister, Mizoram Football ngainatu ni bawk chu an ngen tih an sawi a ni.

BJP Mizoram tarlan danin, nikum oct ni 11 khan PFC chuan Aizawl FC Football Ground, N.Lungleng a Phullem phah nan cheng nuai 546 leh sing 9 a pe a, Aizawl FC duhdan angin Mizoram State Sports Council chu Implementing Agency ah PFC chuan a ruat a, vawiin thlengin hna tan a la ni lo a ni.

He project hi withdraw emaw cancel theih dinhmunah a din tawh avangin Central lam in BJP Mizoram chu a hriattir tawh a, chuvangin thalai te hmakhua ngaitu ZPM Sorkar chuan he Project hi a rang lama tihfel sak thuai turin an ngen an ti a, hmalakna a awm lo anih a, he sum hi pawh let emaw a nih chuan amawhphurtu hi tunge tih mipui hriatah an puang chhuak dawn an ti a ni.

<><><>

PRESIDENT- AYURVEDA

President Draupadi Murmu-i chuan ramhmul damdawi tam zawk a awm theih nan ramchhung thalaite chu Ayurveda sector lamah eizawnna uar turin a sawm. vawiina All India Institute of Ayurveda (AIIA) din cham vawi 8-na New Delhi-a a hawnnaah he thu hi sawiin Pi Murmu-i chuan Ayurveda chu mihring nuna pawimawh tak a ni a ti a. Mi thenkhatin mahni mihringpuite bumin damdawi phuahchawp hmangin sum siam an tum a ti a. Hetiang lakah hian khawng taka hmalak a duh thu sawiin President chuan Ayurvedic doctor tam zawk an awm chuan mipuite tan a tha dawn a ni a ti.

Tunhnaiah Ayurvedic college ah te zirlai an pung chho zel chu lawmawm atih thu sawiin hun lak tur ah Ayurvedic doctor pawh an tam leh zual dawn a ni a ti bawk. President Draupadi Murmu-i hian 'Shashwat Ayush' exhibition leh Ayush Aushadi Kendra a tlangzarh nghal bawk a ni.

<><><>

FORTIFIED RICE

Sawrkar laipui chuan thisen tlakchham anemia leh chaw tha tlakchham ti tlem turin buhfai tihdanglam fortified rice sem tel a remti. Union Information and Broadcasting Minister Ashwini Vaishnaw chuan hemi chungchang hi Union Cabinet thukhawm chuan a pawm tih chanchinbumite a kawmnaah a sawi a. Pu Vaishnaw-a sawidan chuan mitinin taksa mamawh zat chaw tha an hmuh theihna tur huapzau taka hmalakna a ni a. He scheme atan hian cheng vaibelchhe sing khat sang 7 chuang hman tum a ni a ti.

Hei bakah hian ramria hmasawnna ruhrel tichangtlun chungchang pawh ngaihtuah anih thu sawiin Pu Vaishnaw chaun Prime Minister Narendra Modia'n ramri a ngaipawimawh hle a ti a. Rajasthan leh Punjab ah te ramri tichangtlun nan kawngpui km 280 siam turin sawrkarin thutlukna a siam a ti a. He project atan hian cheng vaibelchhe 400 ruahman a ni a ti a. Ramri chhehvela khawsa te tan inkalpawhna tha leh khawsakphung nuam zawk a pe thei dawn a ni a ti.

<><><>

PM IN LAOS

Prime Minister Narendra Modia chuan ni hniih thangin naktuk hian Laos-a Vientiane khawpui a pan dawn a. Union Ministry of External Affairs-a Secretary East Jaideep Mazumdar chuan vawiin khan PM Modia zin tur chungchangah hian chanchinbumite kawmin Pu Modia hian ASEAN-India Summit vawi 21 na leh East Asia Summit vawi 19-na a hmang dawn a ni a ti a. Pu Mazumdar-a sawidanin tun tum hi ASEAN -India Summit a tel vawi 10-na tur a ni a. Laos Prime Minister Sonexay Siphandone sawmna angin Prime Minister Modia hi a zin dawn a. A cham chhung hian India leh ASEAN inkara thil pawimawh hrang hrangte ram hruaitu dangte nen an ngaihtuahho dawn a ni.

<><><>